

Korint 2

adi letama wairabuinama

Pol na waikaiwama

1 Kapore yau banagama Korint nopone miemienimima.
¹Taugu Pol, Yesu Keriso na taunoyama, Mamaitua ya yokoegu be ya vinegu da taugu apasol Mamaitua varinama verenama yà rauguguyena. Taugu be turadama Timoti mate uma letanama yà girugirumina, taumi Mamaitua na ekalesiama Korint nopone miemienimima ġaromie, be mate tauwai sumaġa Akaia nopone miemienidima ġarodie. Taugu be Timoti kawai kaiwemina.

²Mamaitua Tamadama be Bada Yesu Keriso adi raukivivere, be adi subama ġaromie.

Riuwai nuasubasuba Mamaituanama

³Mamaitua dà Badama Yesu Keriso Tamanama, tauna vutuna isanama ka kaisuġusuġuna, baninama tauna raunuatoï be riuwai nuasubasuba Mamaituanama. ⁴Tauma ama piripirie tauna e riuriuwai nuasubasubamaina da tauma uma riuwai nuasubasubanama teneġine tokare banaga ġesaudima adi piripirie tauma mate taudi ka riuwai nuasubesubedina. ⁵Tauma Kerisoe wainuatoïtoï, toïtoï ka banabanavidina, be raġan matabuna Kerisoe e riuriu wainuasubasubamaina. ⁶Tauma piripiri ka banabanavidina, taumi anisagumima da yawasana ko banavina aubainama. Be deġoda tauma Mamaitua na riuwai nuasubasubama ka banabanavidina, inam mate taumi aniriuwai nuasubesubemima aubainama da taumi tokare teneġinama da piripiri ko damiporedina, maika tauma. ⁷Tauma kè kataiena da taumi tokare ami waisumaġe nam ko beku, baninama taumi piripiri ko banabanavidina adi ruvae Mamaitua na riuwai nuasubasubama tokare ko banavidina.

⁸Tauma ka ġoegoena da taumi sibo koya kataiena da tauma Eisia provins nopone piripiri dosi vavasaġidima kè banavidina. Be tauma nam

teneteneḡina da piripiridima sibo kè damiporedi, be ḡaubonaḡa sibo kè gurina. ⁹Tauma kè noḡotina da yodi ama gurima raḡaninama ya tavana. Uma kauinama ya tubuḡana, baninama Mamaitua yai kataiemaina da tauma nam sibo ama rewapanama kèi sumaḡe, ibewa be Mamaitua na rewapanae sibo kèi sumaḡana, baninama tauna vutuna tokare banaga guriguridima e kawa midisuḡu munaḡedina. ¹⁰Tauma ḡaubonaḡa sibo kè gurina, be tauna yai yawasanimaina. Be uma kauinama teneḡine tauma ka noḡonoḡota guratena da tauna tokare ei yawasana munaḡemaina. ¹¹Be taumi mate ami moiragie ko sagumaina. Be Mamaitua tauna banaga toitoi adi moiragima e vaiedi, yodibe tauma e sagumaina, be banaga toitoi ta kita be matabudi Mamaitua tai kaiwena yaba matabudi ya voidina sagumaima aubainama.

Pol na vaḡaima oganama ya vitaredina

¹²Tauma kawai nuaverena yaba tenaḡa ḡarone, be ama noḡotama e riuriuemaina da inam riukaua. Tauma raḡan matabuna Mamaitua na ḡoane be na raukiviveree be riukaue ka miamiana. Be tauma taumi mate tà miamiana raḡanine, tauma nam ama nuauyauyae kama miamiana, be nam airaḡan kama kaikaiyovuemina. ¹³Vutuna aubainama yaba matabudi ka girugiruma wainegenegedina ḡaromie da taumi ko sievidi be ko kataiedina. Be taugu yà noḡonoḡotina da tokare yau giuma banidima debemie ta saḡana. ¹⁴Yodibe dà Badama Yesu na kaba verauma raḡanine taumi koi nuaverena tauma ḡaromaie, maika taudi ḡesaudima nama. Be tauma kai nuavere taumi ḡaromie.

¹⁵⁻¹⁶Uma kauinama aubainama taugu è ḡoena da Masedonia naḡonama aubainama taumi sibo è vakitemina, be mate yau kaba verau munaḡama raḡanine sibo è vakita munaḡemina da taumi waiaiaina rabui sibo koya ragaudina. Yodibe taumi sibo koya kaisagu naweguna Judiama.

¹⁷Taumi koyai noḡotana taugu uma vaḡainama èwai ogena taumi kaiyovuemima aubaina, bo? Bo taugu dobu banegidima maika yàwai kaikaiyovuemi, bo? Taugu nuaguma tuaḡaine be yaba yawai anina yababedi, bo? ¹⁸Ibewa ḡoma! Mamaitua ya kataiena da taugu yà riuriu kauana. Taugu nam nuaguma tuaḡaine yài anina yababa be muriḡa tokare nam e tubuḡa. Taugu aba èi aninena, inam e tubuḡana. ¹⁹Timoti, Saelas be taugu Yesu Keriso Mamaitua Natunama kè rauguguyena ḡaromie. Be tauna nam nuanama tuaḡaine ei anina yababa be muriḡa tokare nam e tubuḡa, ibewa. Aba tauna ya riuena, tokare e tubuḡana. ²⁰Mamaitua na saugama matabudi Yesu Kerisoe a tubuḡana tauda aubaidama. Be tauma banaga matabudi kè riuedina da tauna riukaua patupatutunama, vutuna aubainama isanama ka kaisuḡusuḡuna. ²¹Mamaitua taumi be tauma ya voidana da dà waisumaḡama Yesu Kerisoe ei rewapanana. ²²Mamaitua Arua ya utedana inam ya pusidana. Mamaitua ḡarode Arua Babau ya boru waidebana, be muriḡa tokare yaba matabudi e utedana.

²³Taugu sibo ḡaromie è tavana, be nam e tavana baninama nam e ḡoena da sibo è tainuaboya munaḡemi. Uma kauine Mamaitua yau matamatama. ²⁴Taumi kaite ami waisumaḡe naumeki ko midimidina, be deḡoda muriḡa yà verauna, nam yài badabada ḡaromie, ibewa. Be taugu yà voiemi da taumi koi nuaverena.

2 ¹Vutuna aubainama èi oga da nam sibo ḡaromie è verau munaḡa, be è voiemi da sibo koyai nuaboyana. ²Baninama deḡoda taugu yà tainuaboyemina, aita tokare e tainuaveregu? Nam aita da taumi. ³Vutuna aubainama ḡaromie è girumana da taumi yaba matabudi sibo koya kawa didimanidina, yodibe sibo ḡaromie è tavana. Deḡoda ḡaromie yà tavana, nam ama ḡoḡoena da anitai nuavereguma banegidima, be ta voiegu da ta tainuaboyagu. Taugu è kataiena taumi taugu mate tokare tà nuavere tenaḡana. ⁴Taugu maḡone leta ḡaromie è girumina, inam ḡarogue ya pipiriki kauana, taugu ma nuaboyagu be ma matasurugu. Be nam tai nuaboyemima aubainama è girumana, ibewa da sagumima aubainama, baninama taumi sibo koya kataie kauena da taumi taugu nuaguma koya paḡopaḡo kauena.

**Aita na gewagewama ewai maḡataridina,
naumeki da tauda tà noḡota poredina**

⁵Taugu inam tauḡoma aita gewagewa tauvoienama na voiama è girugirumina ko noḡotina. Tauna nam tauḡuḡa i nuaboyaguna, be matabumi mate. Ibewa, be nam matabumi, agunai bisaḡa. ⁶Be taumi aitaḡa kovoḡa tauna koya uteutena, yodi agunai naumeki. ⁷Be na gewagewama ko noḡota poredi, ko riuwai nuasubasuba be koi anina munaḡena, be nam ko voie da na nuaboyama koi moraba vavasage. ⁸Be yàwai baḡa guratemi da taumi patara matedie sibo koyai anina munaḡe, be tauna e katai munaḡe da taumi yaḡoro tauna kowai nuapaḡoena.

⁹Taugu èi nuavere da yau letae aba è girugirumina taumi koya voteyete, be inam baneginama kovoḡa koya utena. Yodi è katai kauena da taumi yau waibadama yaḡoro kowai aninena. ¹⁰Inam baneginama tauna nam ḡarogue gewagewa i voiena. Be deḡoda taumi na gewagewama ko noḡota porena, naumeki da taumi kami taiye taugu mate Keriso matane yà noḡota porena, ¹¹uma kauine Seitan nam ei yapapateda. Baninama tauda Seitan na waikaikaiyovuma tè kataiena.

¹²Raḡanine taugu è naḡona Troasma Keriso yau kedama ya kaiporena vari verenama rauguguyenama aubainama. ¹³Be baninama turaguma Taitos nam e banavina aubainama, taugu nam ei nuavere kauana. Vutuna aubainama taugu banaga èi kaiwedi be è naḡona Masedoniama.

Keriso tauvai suba

¹⁴Mamaitua yàwai kaiwena, baninama raḡan matabuna tauna Keriso na vaisubae ewai dokedana. Deḡo deḡo tà naḡonaḡona, Mamaitua na kataima tàwai daberarina piupiu ḡabunama maika. ¹⁵Tauda

Keriso mayanama^a tawai daberarina. Be banaga matabudi mate inam mayanama ta damidamina, avedi da taudi tokare yawayawasanidi bo guriguridi. ¹⁶Banaga aitauga da nam timawai sumaḡana, uma mayanama e riuriuedina da taudi inam guriguridima. Be banaga aitauga da tawai sumaḡana, uma mayanama e riuriuedina da taudi inam yawayawasanidima. Be aitu yodi teneteneḡina da uma noyanama dosinama e voie? ¹⁷Tauma nam maika taudi aitauga ta naḡo babara be Mamaitua riunama ta rauguguye be mane ta paḡopaḡona nama, ibewa. Tauma Keriso na taunoyama be Mamaitua ya riuporemaina da tauna matane tauma riukaue ka rarau guguyana.

3 ¹Be tauma nam kama boruboru tavaitemaina. Be tauma ama noyama aubainama nam reprens pepedima ḡaromie kama ḡoeḡoena banaga ḡesaudima maika, ibewa. Be mate tauma reprens pepedima banaga ḡarodie nam ke ḡoedina taumi aubaimima, ibewa. ²Taumi vutuna tauma ama reprens pepama, be nopomaie ka noḡonoḡota watanimina. Be banaga matabudi ta kitekitemina da taumi ami yawasanama koya vitaredina. ³Tauma ama noyama votanama inam taumi. Vutuna aubainama taumi inam maika Keriso na reprens pepama, baninama Mamaitua yawayawasaninama riunama nam pepae ke girumina, ibewa da Arua na rewapanae taumi nopomie kè girumina.

⁴Tauma umanama ka giugiuna, baninama Kerisoe Mamaitua ya voiemaina da uma noyedima ka voiedina. Be tauma kè kataiena da Mamaitua tauna e sagusagumaina da tauma na noyama ka voia kauedina. ⁵Taumaḡa tokare nam uma noyedima ke voiedi, ibewa da Mamaitua na rewapanae ka voivoiedina. ⁶Tauna vutuna ya voiemaina da tauma banaga nema ei yawasana bakedina kedanama vaunama sibo kè riuedina. Deḡoda banaga tarawatu tawai muriwatanena, taudi tokare nam yawasana ta banavi, ibewa. Be Arua Babaue tokare yawasana ta banavina. Yawasana kedanama porane banaga a raurubu da riuvavasaga 10 a voteyeteyedina, be matabudi guri a banavina. Be yawasana kedanama vaunama inam banaga Keriso tawai muriwatanena taudi tokare Keriso na Arue yawasana ta banavina.

**Yawasana kedanama vaunama inam ya vere
kauana, nam poranama maika**

⁷Uma ko noḡoti. Mamaitua banaga tarawatu ya utedina. Avedi da Mamaitua ma borumina uma tarawatudima yeku bogedie ya girumidina, be yaḡoro uma tarawatudima ta voie da banaga ta gurigurina. Uma boruminama aubainama Mosis noḡonama ya yana vavasaga, be Israel banegidima taudi nam teneteneḡina da Mosis noḡonama sibo a kitadidi.

^a 2.15 Pol na bonae ya riuna 'ḡabu'. Inam taudi adi giuma na ruvae be tauda inam 'maya'.

Be inam yananama ya nuayaḡotana. ⁸⁻¹⁰Be Arua Babau tauna yawasana kedanama vaunama yai kataiedana, inam kedane banaga didimana be yawasana ta banabanavidina. Vutuna aubainama na borumama ya saḡa da ya saḡa vavasaḡana, nam tarawatu boruminama maika, baninama tarawatue banaga guri ta banabanavina. ¹¹Yawasana kedanama poranama ya nuayaḡotana vutuna aubainama na borumama mate ya nuayaḡotana. Be Yawasana kedanama vaunama kenakena nonoḡinama aubainama, na borumama dosinama.

¹²Inam kaudima kè katai kauedina aubainama, tauma ma raudebatoramai ka rarau guguyana. ¹³Mousis tauna noḡonama ya rupuna, baninama Israel banegidima nam ti ḡoena da neneḡara boruminama Mousis noḡone ya nuanua yaḡotana sibo a kita. Be tauma ama borumama nam maika Mousis. ¹⁴⁻¹⁶Be Israel banegidima nopodima ya badona naumeki da yodi. Raḡanine Mousis na tarawatuma ta siesievina taudi nuedima yaḡoro rupurupunama, vutuna aubainama aba ta siesievina, baninama nam tima paḡopaḡo kauena. Be aitu Bada ewai sumaḡena, inam raḡanine rupu e nuaporaḡa be tauna Mamaitua riunama ta siesievina, baninama e paḡopaḡona. ¹⁷Be Bada tauna vutuna Arua Babau. Be deḡoda Bada Aruinama nopode e miamiana, taune tokare tarawatu na rewapanama ḡarode e kovi be kuvesa tà banavina. ¹⁸Be tauda tauwai sumaḡa noḡode nam rupu ima kenakenana. Vutuna aubainama tauda Bada na borumama tà kitakitana, be Arua Babau e rawarawa vaudana da kitadama tauna maika.

Pol riukaue e rarau guguyana

4 ¹Mamaitua na raukiviveree tauna rauguguya noyanama ya utemaina. Vutuna aubainama tauma nam kama tunitunituaḡaina. ²Be tauma kaua semosemodi be waitunimayamayaḡidima kè gosaḡana. Be banaga nam kama kaikaiyovuedina, be Mamaitua na giuma nam kaiyovue kama giugiu yabayababedina, ibewa. Da raḡan matabuna tauma Mamaitua matane riukaua ka rarau guguyena da banaga matabudi sibo a kataiemai da tauma riukaua banegimaima.

³Tauma vari verenama ka rarau guguye be aitaḡa da guri kedanama ta watawatanina, taudi uma varinama nam tima paḡopaḡona, ⁴baninama dobu mamaituanama kaikaiyovunama taudi nopodima ya kawa kupikupina, da taudi vari verenama na yanama nam tima katakataiena. Baninama Mamaitua boruminama matabuna natunama Yesu Keriso ḡarone e rawarawa maḡatarina, be taudi uma kauinama nam ti katai kauena. ⁵Baninama tauma nam taumaḡa kama rarau guguya munaḡemaina, ibewa. Yesu Keriso tauna Bada, vutuna tauma ka rarau guguyena. Be Yesu kana taiye tauma taumi ami taunoyama. ⁶Mamaitua ya riuna, “Yana waikupikupie sibo ya yana.” Be inam Mamaituanama

tauna vutuna nopomaima yai yanana, be yodi tauma Mamaitua na borumama Kerisoe ka kitakitana.

Tauma maika gurewa

⁷Be tauma tubuḡimaima maika gurewa be yaḡoro Mamaitua varinama verenama tauma nopomaie e kenakenana. Vutuna aubainama banaga sibo a kataie da vari verenama na rewapanama dosi vavasāḡinama inam nam tauma ḡaromai, ibewa da Mamaitua ḡaronama.

⁸Gewagewae a ḡakiḡakimaina be nam ke nuagoruna, a kawa nuaraḡaraḡa kauemaina, be yaḡoro keda kè banavidina. ⁹Banaga a raraukivi gewegewemaina be Mamaitua nam airaḡan i gosemaina. Be awai mia bakokomaina be tauma kè midimidisuḡu munaḡana. ¹⁰Tauma raḡan matabuna ma kaba babare tubuḡimaie guri ka kitakita saḡena, teneḡinama maika Yesu. Be mate Yesu na yawasanama tauma tubuḡimaie ewai maḡataridina.

¹¹Vutuna aubainama avedi da tauma banaga yawayawasanimaima be Yesu kana taiye tauma raḡan matabuna guri ka kitakita saḡena, da Yesu na yawasanama tauma tubuḡimaie ewai maḡataridina. ¹²Taumi ami yawasanama kana taiye tauma raḡan matabuna gewagewa be guri ka banabanavidina.

¹³Tauma ma raudebatoramai aba kawai sumaḡena nama ka rarau guguyena, maika girugiruminama poranama e riuriuna umanama, “Taugu yàwai sumaḡana aubainama yà giugiuna.” ¹⁴Baninama tauma kè kataiena da Mamaitua Bada Yesu gurie be ya kawakawa midisuḡu munaḡena, tauna vutuna tauma mate e kawa midisuḡumaina, be tokare tauma taumi mate e nawe tenaḡedana tauna ḡarone. ¹⁵Uma kauidima matabudi inam taumi anisagumima aubainama da Mamaitua na raukiviverema e daberarana banaga toitoi ḡarodie. Be tokare taudi Mamaitua tai kaiwa kauena be isanama ta kaisuḡusuḡuna.

¹⁶Vutuna aubainama tauma nuamaima nam e beku. Be avedi da tubuḡimaima e vovo gwaḡagwaḡa be nopomaima raḡan patapatanama e rawarawa vauna. ¹⁷Be tauda dā piriḡirima uma dabudine a tupotupo be a tekatekana, be uma piriḡiridima ta voie da tauda tokare maesa saḡasaḡa vavasāḡinama tà paḡona, gewagewa mate nam tòi tarapate be teneteneḡina. ¹⁸Vutuna aubainama yaba kitekitedima ḡarodie nam tòi kita, ibewa, be yaba nam anikitakita ḡarodie tòi kitana. Baninama yaba anikitakita taudi tokare tai kavena, be yaba nam anikitakita taudi tokare ta kena nonoḡana.

Dà vada ḡomama marae

5 ¹Tauda tè kataiena da uma dobunama kapene yodi mate tà miamiana tokare e gewagewana. Be Mamaitua vada ḡesaunama

tauda e utedana. Inam vadanama^b marae kenakena nonoḡinama be nam banaga nimedie ti kerina. ²Yodi tauda tà noḡonoḡota guratena da tauda tokare marae dà vadama tà paḡona, ³be raḡanine tà gurina aruidama nam sibo ya mia yababa, tauna naumeki da na vadae sibo ya miana. ⁴Yodi raḡanine dobu tubuḡine tà mia be tà yakeyakeina, baninama tauda piripiri toitoi tà banabanavidina aubainama. Be tauda nam tama ḡoeḡoena da sibo tè guri, baninama raḡanine tà gurina aruidama inam maika kabe iwai kovakova. Vutuna aubainama tauda tà ḡoeḡoe guratena da nam sibo tè guri be mara tubuḡinama vaunama sibo tè paḡona. Inam kedane yawasana kenakena nonoḡinama tauna yawasana samosamoinama tokare e tonoḡina. ⁵Mamaitua tauna vutuna tauda ya voidana uma kauidima aubaidima. Be tauna ḡarode Arua Babau ya boru waidebana, be muriḡa tokare tubuḡidama vaunama e utedana.

⁶Vutuna aubainama tauda raḡan matabuna tawai nuaverena, baninama tè kaitaiena da tokare tubuḡa vaunama tà paḡona. Be tauda uma dobonama tubuḡine tà miamiana raḡanine, tauda inam nam Bada diane tama miamiana. ⁷Avedi da tauda uma yabedima nam tama kitekitedina, be waisumaḡe tà katakataiedina. ⁸Deḡoda tauda tà gurina inam naumeki, baninama tubuḡa poranama tà gosena raḡanine, tauda tokare Bada mate tà mia kauana. ⁹Vutuna aubainama aveidi da tauda tubuḡa porane bo tubuḡa vaune, be raḡan matabuna tà rarau rubu da Bada tàwai nuaverena. ¹⁰Baninama tokare tauda tenatenaḡaḡa Keriso noḡone tà midi be yaba veredi bo gewegewedima uma dobune tè voivoiedina adi ruvae tauna tokare e etareda be ei maesidana.

Mamaitua Kerisoe suba ya utedana

¹¹Tauda sibo Bada tè nairena, vutuna aubainama tauma banaga toitoi kè giu yaḡeyaḡedina da sibo Bada ai muriwatanena. Mamaitua ya kataiena da tauma riukaua banegimaima be tauma ka noḡonoḡotina da taumi mate nama ko noḡonoḡotimaina. ¹²Be tauma nam kama boruboru tavatavaite munaḡemaina, ibewa. Be tauma ama noyama verenama aubainama taumi sibo koya rauguyaguyauemaina. Yodibe taumi banaga aitaḡa yaba matae kitekitedima ta rarau guyaguyauedina sibo koya kawa didimanidina, baninama taudi nam didimana banegidi. ¹³Deḡoda riukaua banaga ta riuna, tauma ama voia be ama giuma bua maika, inam naumeki. Tauma Mamaitua na noyama ka voivoie. Be deḡoda tauma ama noḡotama e didimanana inam naumeki, taumi anisagumima aubainama. ¹⁴Bada na wainuapaḡoe ewai dokedana, baninama tauma kè kataiena

^b 5.1 Uma dobonama kapenama inam tauda tubuḡidama vovogwaḡaḡawaḡanama yodi tà miamiana. Be vada ḡesaunama inam tubuḡa vaunama tokare marae tà paḡona. Inam yai rewapana kauana.

da tauna ya gurina tauda matabuda aubaidama. Vutuna aubainama tauda matabuda dà yawasanama poredie Keriso mate tè guri tenaḡana. ¹⁵Be tauna ya gurina tauda matabuda aubaidama. Vutuna aubainama yodi nam taudame dà ḡoane tama miamiana, ibewa da tauna na ḡoane sibo tè miana. Baninama tauda kada taiye tauna ya guri be ya midisuḡu munāḡana aubaidama.

¹⁶Noḡone tauma Keriso na yawasanama tubuḡe kè kitakita wairuvana, be yodi inam ibewa. Yodi tauma nam airaḡan banaga adi yawasanama tubuḡe kama kitakita wairuvedina, dobu banegidima maika. ¹⁷Vutuna aubainama aita da Keriso ḡarone e miamiana, tauna inam tubuḡa vaunama. Yawasana poranama ya naḡona be yawasana vaunama ya tavana.

¹⁸Inam yabedima matabudi Mamaituae ta tubutubuḡana. Tauna Yesu Kerisoe yai taurana munaḡedana. Be tauma ya riuporemaina da banaga ḡesaudima mate ka verauḡa munaḡedina tauna ḡarone. ¹⁹Mamaitua banaga matabudi Yesu Kerisoe yai turana munaḡedina, be tauna banaga adi gewagewama nam i sievidina. Be tauna ya riuemaina da inam waitureninama banaga ḡarodie sibo kè rauguguyena. ²⁰Tauma Keriso epaiyanama be Mamaitua taumaie taumi ḡaromie e giugiuna. Vutuna aubainama tauma Keriso kè rauelpaiye be ka riuriuemina umanama, “Mamaitua koi turanena.” ²¹Keriso gewagewa nam i voiedina, be dobu banegidama kada taiye Mamaitua dà gewagewama Yesu Keriso na korosima debane ya biridina da Mamaitua tauda sibo ya kawa didimanidana.

6 ¹Tauma Mamaitua na taunoyama be ka riu vavasaḡemina: Taumi Mamaitua na raukiviverema koya paḡona, be nam inam raukiviverenama ko voia yababena. ²Mamaitua umanama ya riuna, “Tauguḡa taumi ami raḡanima è boruna da yai yawasanimina. Be inam raḡanine taugu ami ḡabama è vaie be è sagumina.” Koya vaie, inam raḡaninama yodi ya tavana da Mamaitua vere e voiena ḡarode.

Pol na pipirima ya giuedina

³Tauma nam aiyaba gewegewedima kama voivoiedina da banaga tauma ama noyama ta riutuatuagaie, ibewa, ⁴be yaba matabudi ka voivoiedina sibo banaga a kitamai be ai kawa riukauemai da tauma naumeki Mamaitua na taunoyama. Be raḡan matabuna tauma pipiripi be gewagewa matabudi ka damidami poredina. ⁵Banaga a riḡariḡamai, dibure a birimai, patara a ḡasiemai, kè bagibagi gurata, nam kena kua, kani kè gurina. Inam yabedima matabudi kè dami poredina. ⁶Tauma raḡan matabuna nam aba gewagewanama banaga ḡarodie ke voiena, ibewa. Be tauma raḡan matabuna Arua Babaue banaga

kèi nuapaḡoedi be nuatauḡa raukiviveree kè noyanoyana. ⁷Tauma raḡan matabuna Mamaitua na rewapanae riukaua kè rarau guguyena. Didimana vutuna tauma ama tuniḡaḡara be ama madama. ⁸Banaga ḡesaudima ta viviviviremaina, be ḡesaudima nam tima viviviviremaina, ta kunukunuremaina be ḡesaudima isaima ta kaikai suḡusuḡuna. ḡesaudima ta riuriu waikaikaiyovuemaina, be yaḡoro tauma riukaua ka giugiuna. ⁹Uma dobunama inam e nuanuababaḡemaina be Mamaitua e katakataiemaina. Raḡan matabuna guri ka kitakita saḡesaḡena, be yaḡoro ka miamiana. Banaga ta riḡariḡamaina be nam timawai gurimaina. ¹⁰Banaga tawai nuaboyamaina be raḡan matabuna tauma kawai nuaverena. Tauma waikaruwaḡawaḡamaima, be banaga toitoi ka sagudi da tawai guyauna. Tauma nam waipurapuramai be yaḡoro yaba matabudi inam tauma ḡaromaima.

¹¹Taumi yau banagama Korint, taugu nam ḡaromie giu ei daḡasiena, ibewa da yau giuma didimanidie è giuemina. Taugu nopoguma è raḡa porenataumi ḡaromie. ¹²Taugu nuaguma nam taumi ḡaromie ama guduguduna, be taumi taugu ḡarogue nuemima ko guduguduna. ¹³Taumi yau sedama aubainama, yàwai baḡemina da taumi mate sibo nopomima koya kaiporena ḡarogue.

Banaga nam waisumeḡidi nam mate koi rawateḡeimi

¹⁴Waisumaḡa banegimima nam kupi banegidima mate koi rawateḡeimi. Baninama vere nam gewagewa mate tai rawateḡeidi be teneteneḡina. Be yana nam kupi mate tai rawateḡeidi be teneteneḡina. ¹⁵Be Keriso nam Seitan mate tai rawateḡeidi be teneteneḡina. Waisumaḡa banegidima nema kupi banegidima mate tai rawateḡeidi bakedi? ¹⁶Be Mamaitua na vadama kokoitau mate nema tai rawateḡeidi bakedi? Be tauda Mamaitua yawayawasaninama na vadama, baninama tauna umanama ya riuna:

“Taugu taumi mate tà mia
be tà babarana.

Taugu taumi ami Mamaituama
be taumi taugu yau banagama.”

¹⁷“Vutuna aubainama taumi kupi banegidima ko gosedi
be ḡavoe ko mia.

Nam kaua miremiredima ko rabedi,
inam raḡanine taugu tokare yài aninemina.”

¹⁸“Taugu taumi Tamemima
be taumi taugu yau sedama.

Nama Bada wairewapana vavasaginama ya riuna.”

7 ¹Yau bana, yodi uma saugidima ḡarode Bada ya voidina, aubainama yaba gewegwedima matabudi tauda tubuḡidama be

aruidama ta kawakawa miremiredina sibo tè gosaḡana. Be Mamaitua anivivirenama aubainama tauda raḡan matabuna tè raurubu da veree sibo tè miana.

**Korint banegidima Pol ai turana munagena
aubainama, nuanama ya verena**

²Yau bana, nopomima ko kaiporena ḡarogue. Tauma nam aitaḡ ḡarome aba ke kawa gewagewana. Be nam aitaḡ kei kedadoka waigewamna. Be nam aitaḡ ke kaikaiyovuemna. ³Taugu nam uma yabedima taumi waiwavumima aubainama ama giugiuedina, ibewa. Taugu noḡone è riuemina da taumi nuaguma ko paḡopaḡona. Be avedi da tà mia tenaḡa bo tà guri tenaḡana, yaḡoro nuaguma ko paḡopaḡona. ⁴Taugu yàwai sumaḡa guratemi be yàwai guyaguyauemina Taitos ya duḡumina aubainama. Vutuna aubainama yau piriḡirie taugu raḡan matabuna yàwai nuavere guratana.

⁵Be tauma Masedoniamama kè tavana raḡanine piriḡiri ya moraba kauana, be nam deḡo suba ke banavina. Tauma banaga a riu vireviremai be naira nopomaima ya moḡavuna. ⁶Be Mamaitua tauna vutuna banaga wainuatoitoidima ewai nuasubedina, tauna tauma yai nuasubamaina Taitos na kaba veraue. ⁷Be taumi Taitos koyai nuasubana, aubainama tauma kèi nuaverena. Taitos ya riueguna da taumi ko ḡoeḡoe guratena da taugu sibo koya kitaguna. Be ami giuma gewegewedima ḡarogue koya riuriueguna, aubaidima yodi kowai nuaboyana. Be mate taumi taugu koya midi ḡaḡariguna. Vutuna aubainama taugu yodi èi nuavere da èi nuavere vavasaḡana.

⁸Deḡoda yau letama ima kawakawa nuaboyemi inam naumeki, taugu nam ama siesievimina. Noḡone è siesievimina, baninama yau letama raḡan ḡaubonaḡa ya kawa nuaboyemina aubainama, be yodi ⁹taugu èi nuaverena. Nam ami wainuaboyama aubainama èi nuaverena, ibewa. Be taugu èi nuaverena, baninama ami wainuaboyama ya voiemi da taumi ami noḡotama koya vitarena. Vutuna aubainama taumi Mamaitua na ḡoane naumeki da koyai nuaboyana. Be tauma nam aba gewagewanama ḡaromie ke voiena, ibewa. ¹⁰Deḡoda Mamaitua na ḡoane nuaboya ta tubutubuḡana, inam ya verena, baninama inam nuaboyedima ta voie da banaga adi noḡotama ta vitaredi be yawasana ta banabanavidina. Vutuna aubainama banaga sibo ai nuaverena, deḡoda uma nuaboyedima ta banabanavidina raḡanine. Be deḡoda doḡu na ḡoane nuaboya ta tubutubuḡana, inam nuaboyedima ta voie da banaga guri ta banabanavina.

¹¹Taumi ami nuaboyama Mamaitua na ḡoane tubutubuḡinama yodi na verema e voiena ko kitana: Taumi ami gewagewama koya kawa didimanidina, taumi taugu koya midi ḡaḡariguna, taumi banaga

gewagewanama kana taiye nuemima yai medina, be taumi taugu ko nainaireguna. Taumi ko ḡoēḡoē guratena da taugu sibo koya kitaguna, be taumi banaga gewagewanama na kovoḡama koya ute makaiena. Inam yabedie taumi yodi kowai maḡatara munaḡemina da taumi gewagewae be yodi koya kawa vere munaḡemina. ¹²Taugu ami letama è girugirumina raḡanine nam tauḡoma gewagewa tauvoienama na kauama aubainama è girumina, bo nam gewagewa ḡarogue a tubutubuḡana aubainama è girumima, ibewa. Taugu è girumana da taumi Mamaitua matane sibo koyai maḡatara munaḡemina da taumi taugu yaḡoro murigue ko midimidina. ¹³Uma kauidima a tubuḡana aubainama taugu nuaguma ya vere kauana.

Be kaua wairabuina inam taumi Taitos koyai nuasubana. Vutuna aubainama tauna ma nuaverena ḡaromaie ya tava munaḡana, be tauma kèi nuavere kauana. ¹⁴Noḡone taugu ami kauama be ami voiamata veredima matabudi Taitos è riue be isemima mate è kawa saḡena. Uma giudima matabudi Taitos ḡarone a tubuḡana aubainama taugu nam e tunimayaḡana. Aba da taumi kè giugiuemina, inam matabuna riukaua. Be teneḡinama nama, aba da tauma Taitos kè riuriuena, inam matabuna riukaua. ¹⁵Taumi Taitos na giuma koya voteyeteye, be koya raurubu guratana da nema sibo tauna koyai nuavere bakena, vutuna Taitos yaḡoro e noḡonoḡotimi be ewai nuapaḡo vavasagemina. ¹⁶Be taugu ei nuavere kauana, baninama yodi è kaitai kauena da taumi taugu murigue ko midimidina.

Uta na kauama

8 ¹⁻²Be yodi yau bana, ekalesia Masedoniama koi nuanoḡonoḡotedi. Taudi adi piripirima a moraba kauana be ai karuwaḡawaḡa guratana. Be Mamaitua na raukiviverema aubainama taudi banaga paipairudima. Vutuna aubainama mane toitoi ma nuaveredi ai utana. ³Taugu matague è kita kauedina da taudi adi waiutama na ruvama ya kenana, be debane a boru munaḡe be awai utana. Tauma nam ke riuedina da taudi nama sibo a voia, ibewa da taudiḡa adi ḡoane nama a voivoiana. ⁴Taudi a ḡasakiriemaina da adi manema sibo kè paḡo nawena Jeruslemma tauwai sumaḡa anisagudima aubainama. ⁵Taudi nam tauma aba ke noḡonoḡotina na ruvae nama ti voiana. Ibewa da Mamaitua na ḡoane nama noḡone taudime ai uta munaḡedina Bada ḡarone, yodibe taudi tauma ai aninamai, be a voteyeteyemaina.

⁶Vutuna aubainama Taitos ei baḡa guratena da tauna ḡaromie sibo ya tavana, da Mamaitua na raunuatoima noyanama^c Taitos noḡone

^c 8.6 'Mamaitua na raunuatoima noyanama' inam mane borunama Bada na noyama aubainama.

yawai karena ġaromie, vutuna sibo ya kaiġavutina be manenama koya vovo kaukauena sibo ya paġona. ⁷Taumi yaba matabudi ġarodie ko moramoraba guratana. Ami waisumaġama, ami giuma, ami kataima, ami noġotama veredima be ami wainuapaġoma ġaromaie. Vutuna aubainama ami waiutama mate sibo ya moraba guratana. ⁸Taugu nam ama riuriu vavasagemina, ibewa da ami wainuapaġoma Masedonia banegidima mate yàwai ruvaruvana da taumi ami wainuapaġoma yà kitana, riukaua bo kaiyovu.

⁹Dà Badama Yesu Keriso ko noġoti. Tauna na raunuatoima ya moraba guratana. Tauna guyau, be taumi kami taiye tauna ya voia munaġe da yai karuwaġawaġana. Tauna na waikaruwaġawaġae taumi yodi kowai guyauna.

¹⁰Be yodi yà riuemi da nema sibo koya voia bakona. Maġo modine taumi noġone uma noyanama koyai kare doke da mane borunama koyai karena. ¹¹Vutuna aubainama waiuta noyanama noġone ma nuaveremi koyawai ogena, naumeki da yodi ma nuaveremi ko kaiġavutina. Taumi ami ruvae, nama koi utana. ¹²Deġoda waiuta ko ġoena, naumeki da am maesama na ruvae nama rauġaubonaġa kwai utana, be yaġoro tokare Mamaitua am waiutama ei aninena. ¹³⁻¹⁴Taugu nam banaga sagudima aubainama taumi ġaromie sibo yaba matabudi è ragaudina. Ibewa da yodi taumi ġaromie toitoi aubainama, naumeki da taumi taudi ko sagudina, be raġanine taudi ġarodie e toina, naumeki da taumi ta sagumina. Uma kauine matabumi ko voie da teneteneġinama. ¹⁵Maika girugiruminama poranama ya riuna umanama, “Aitau da toitoi ya ragauna, tauna ġarone nam ti toi kauana. Be aitau da raubisaġa ya ragauna, tauna ġarone nam ti raubisaġa kauana.”

Jerusalem adi puyoma taunawenama

¹⁶Taugu Mamaitua yàwai kaiwena da taugu taumi nema yà noġonoġota bakemina, noġotinama tenegina nama Taitos taumi e noġonoġotimina. ¹⁷Taitos èi baġana da taumi sibo ya vakitemina. Be tauna mate ġaromie veraunama ya ġoegoena, be raġanine taugu èwai baġana naumeki da tauna ya kayo waianinana. ¹⁸Be tauma tauġoma tenaġa mate ka riuriuporedina. Tauna vutuna vari verenama taurauguguyena, be ekalesia dobu matabuna tauna isanama ta kawakawa saġena. ¹⁹⁻²⁰Uma banegina tauna vutuna ekalesia a vinena da tauna tauma mate puyo ka kiroġa nawena Jerusalem da nam aitau tauma tai karakara kutuamai be tai wavumai, baninama puyo dosinama aubainama. Uma kauine tauma Mamaitua isanama ka kawa saġena. Be banaga matabudi ta kataiemai da tauma riukaua banaga wainuatoitoidima sagudima ka ġoegoena. ²¹Tauma ka ġoegoena da yaba matabuna didimanidie ka voidina, nam Mamaitua taunaġa matane, be banaga mate matedie.

²² Be tauḡoma ḡesaunama mate ka riuriuporena ḡaromie. Tauna mate tauwai sumaḡa verenama. Tauma raḡan toitoi kè raurubu be kè kita da tauna noya taupaḡodidinama baneginama. Taugu tauna è riuena da taumi puyo kaite koya vokaukauena, vutuna aubainama tauna naḡo ya ḡoe kauena. ²³ Be Taitos tauna taugu turaguma be matabumai taumi aubaimima ka noyanoyana. Be tautauḡoma ḡesaudima rabui taudi ekalesia ta rarau epaiyedina, be taudi adi yawasanae Bada isanama ta kaikai suḡusuḡuna banaga matedie. ²⁴ Vutuna aubainama taumi yaba matabudi veredima uma banegidima ḡarodie ko voidi da ami wainupaḡoma taudi ḡarodie koi maḡataridina. Yodibe ekalesia matabudi ta kitemi be ta kataie da aba aubainama tauma taumi ḡaromie kawai nuaverena.

9 ¹ Taugu nam Mamaitua na damma sagudima aubainama sibo è giruma be è riuemina, ² baninama taugu è kataiena da taumi waisagu ko ḡoēgoena. Be raḡan matabuna taugu taumi isemima Masedonia banegidima ḡarodie è kawa saḡemi be umanama è riuedina, “Maḡo modine Akaia banegidima^d taudi a vokaukaua wainonoḡana waiuta aubainama.” Be raḡanine Masedonia banegidima uma giunama nama a vaivaiena, taudi nuedima ya karati be a ḡoēgoena da taudi mate sibo ai utana. ³ Vutuna aubainama uma banegidima yà riuriupore verauḡedina ḡaromie da taudi ta kitemi da taumi naumeki riukaua koya vokaukauana. Taugu uma kauinama yà voivoiena, baninama yà ḡoēgoena da Masedonia banegidima ḡarodie aba è giugiuena nama e tubuḡana, be nam ei kave. ⁴ Be deḡoda Masedonia banegidima ḡesaudima mate tokare ḡaromie ka tavana, be ta kita da taumi nam waiuta aubainama ko vokaukauana, inam raḡanine tauma be taumi mate tunimayaḡa e kawa guridana, baninama noḡone tauma uma kauinama aubainama taumi isemima kè kawa saḡe yababena. ⁵ Maḡo modine koya saugana da ami pairue puyo dosinama ko voiena. Vutuna aubainama taugu yau banagama yà riuriupore dokedina da ta vakitemi be ta sagumi da ami puyoma ko kaḡavuḡavutidina. Yodibe ami puyoma tokare kawakawa nonoḡinama ko raupuyoena. Be banaga matabudi ta kita da taumi riukaua nuemima tabutabune kowai utana. Be deḡoda taumi nam ko vokaukaua wainonoḡa, banaga tokare tai noḡotana da taumi nam nuemima tabutabune uta koma ḡoēgoena.

Kuristen banegidima nema sibo ai uta bakona

⁶ Yau bana, uma kauinama ko noḡoti: Aitau da sipi ḡaubonama ya kumana, tauna na maurama ḡaubonama e banavina. Be aitau da sipi dosinama ya kumana, tauna na maurama dosinama e banavina. ⁷ Vutuna

^d 9.2 Korint meagainama inam Akaia provinsnama nopone.

aubainama banaga tenatenaḡaḡa sibo nuane yai nuanogōnogōta da na ḡoane nama sibo mane ya boruna. Be nam banaga ḡesaudima adi ḡoane a suvedidi be sibo ya boru, baninama Mamaitua ya ḡoēḡoena da banaga nuane ma nuaverena ei utana. ⁸Be Mamaitua tauna teneteneḡinama da raḡan matabuna ami ḡoanama yabedima matabudi be yaba ḡesaudima mate e utemina. Be taumi tokare teneteneḡinama ami banagama ḡesaudima mate ko sagudina, ⁹maika girugiruminama porane e riuriuna nama:

“Tauwai sumaḡa baneginama na pairuma dosine banaga waikaruwaḡewaḡedima e paipairuedina.

Vutuna aubainama na verema banaga ta noḡonogōta watanena raḡan matabuna.

Be na maesama marae Mamaitua e utena.”

¹⁰Be Mamaitua tauna pesi ya utemina kumanama aubainama, be kani ya utemina inam kaninama aubainama. Be tauna pesi yaḡoro e uteutemina da ami noyama veredima ta maurana.

¹¹Mamaitua raḡan matabuna yaba toitoi e utemi da taumi raḡan matabuna ko pairu nonoḡana. Be yodi tauma ami puyoma ka nawena Jerusalem ekalesia waikaruwaḡewaḡedima ḡarodie. Be taudi tokare Mamaitua tai kaiwe, be isanama ta kaisuḡuna ami raupuyoma aubainama. ¹²Uma noyane yaba veredima rabui tokare ta tubuḡana. Tenaḡa inam: Taumi banaga waikaruwaḡewaḡedima ko sagusagudina. Be wairabuinama inam: Banaga aitaḡa ko sagusagudina, taudi tokare Mamaitua tai kaiwa vavasāḡena. ¹³Be taudi Mamaitua isanama ta kaisuḡuna, baninama taumi kowai maḡatara munaḡemina da taumi Keriso riunama nam koma rarau guguya yababena, ibewa da yaba ko giugiuedina nama ta tubutubuḡana. Be mate taudi tokare nuedima e verena, baninama ami waisaguma taudi be banaga ḡesaudima mate ḡarodie aubainama. ¹⁴Vutuna aubainama Jerusalem banegidima nuedima tabutabune ta moimoiragina taumi aubaimima, baninama Mamaitua na raukiviverema taumie da taudi ḡarodie e maḡamaḡatarana.

¹⁵Uma puyonama Mamaitua ya uteutedana inam ya moraba vavasāḡana, be tauda tokare nam tà giue be teneteneḡina. Vutuna aubainama tauda Mamaitua tai kaiwena uma puyonama aubainama.

**Banaga Pol na noyama waibekunama a ḡoēḡoena,
be taunaḡa ya giu raukosogaiḡina**

10 ¹Yodi taugu yau kauama Kerisoe nuataḡa ya ḡiuemina. Taumi ḡesaumima ko riuriuna, “Pol raḡanine madanie tauna debanama torane e giugiuna, be raḡanine uma dabudine e tavatavana tauna tauda matade giu e moḡimoḡiḡina.” ²Yà riuriuemina da raḡanine taugu ḡaromie ya tavana, nam ko voiegu da taugu ya raudebatora. Be

taudi aitauga taugu tai giugiuegu be umanama ta riuriuna, “Pol raḡan matabuna e voivoiana maika kabe tauna waisumaḡa banegina, be yaḡoro tauna dobu na ḡoane e miamiana.” Taugu inam banegidima mate waigiunama, nam ama nainairedina. ³Inam riukaua da taugu dobu yà miamiana, be taugu nam dobu banegidima maika ama iḡaiḡarana. ⁴Taugu Mamaitua na madae yà iḡaiḡarana, be nam dobu banegidima adi madae. Be Mamaitua na madama taudi ai rewapana vavasagana da tokare kupi adi rewapanama matabudi e kawa gewegewedina. ⁵Be mate giu be waikatakatai kaikaiyovudima è kawa gewegewedi be yaba gewegewedima ḡesaudima Mamaitua na kedama ta gudugududina yà vamutudina. Be noḡota matabudi yà boinidi da Keriso ta voteyeteyena. ⁶Be taumi Keriso ko vovo teyetyena raḡanine, taugu banaga rawarawa ḡaiḡaidima yà kovoḡidina.

⁷Taumi tubuḡiguma ḡavoe ko kitakitana, be nopogue nam koma kitakitana. Be tam aitau kwa noḡonoḡotimna da tam Keriso ḡaronama, tam sibo kuya kataie da taugu mate Keriso ḡarone. ⁸Taugu yau waibadama Bada ya uteguna, aubainama agunai tauguḡa ḡaubonaḡa yà kawakawa saḡe munaḡeguna. Be taumi sibo koya noḡoti da yau waibadama inam sagumima aubainama, be nam kawa gewegewemima aubaina, ibewa. Vutuna aubainama taugu nam aiyaba tokare yà tunimayaḡe.

⁹Taugu nam ama ḡoḡoena da banaga tai noḡotana da taugu kabe yau letae yàwai nainairimi. ¹⁰Taumi ḡesaumima ko riuriuna da taugu yau letama nopone yau giuma anikitedima maika a bagibagi be ai rewapana kauana. Be mate matabudi kabe waigiugiu yababa, be yau rauguguyama mate ḡarodie a gewagewa kauana. ¹¹Vutuna aubainama yodi raḡanine ḡaromie yà tavana taudi aitauga a riuriueguna ḡarodie bonaguma bagibagine yà riuedina, maika nema letae bonaguma bagibagine è giugiuedina nama.

¹²Yà riuriu kauemina da taugu nam inam banegidima taudi aitauga ta kawakawa saḡe munaḡedi, be isedima ta kaikai suḡu munaḡedina maika. Taudi a bua kauana, baninama taudi adi ḡoanama ruvane nama tawai ruvaruvana, be adi yawasanama adi banagama adi banagama mate tawai ruvaruva munaḡedina.

¹³Deḡoda taugu yaba nam e voiena, naumeki da nam inam yabanama aubainama yà kawa saḡe munaḡegu. Be taugu yau noyama Mamaitua ya utegu da vari verenama ḡaromie è verauḡena, uma noyanama aubainama taugu yà kawakawa saḡe munaḡeguna. ¹⁴Taugu yà kawakawa saḡe munaḡeguna, baninama yàwai bademina aubainama. Be inam naumeki baninama taugu noḡone Keriso varinama è verauḡena ḡaromie aubainama. Deḡoda taugu nam ei doka nawemi Keriso ḡarone, naumeki da taugu nam taumi sibo ḡaromie è badabada. ¹⁵Baninama banaga

ġesaunama na noyae taugu nam yàì badabada yababa be yà kawa saġe munaġegu, ibewa. Be taugu yà noġonoġotina da taumi ami waisumaġama ei rewapana be taugu yau noyama ġaromie e morabana, ¹⁶be tokare dobu ġesaudima murimie mate Keriso varinama yà rauguguya nawena deġo nam aitau noġonama i boruboruna. Inam raġanine nam aitau tokare teneteneġina da e riuna, taugu kabe banaga ġesaunama na noyae yà kawakawa saġe munaġegu. Taugu banaga ġesaudima adi noyae nam yà kawa saġe munaġegu, vutuna yà tuatuaġaiena.

¹⁷“Aitau da kawa saġe munaġenama e ġoena, naumeki da tauna sibo aba Bada ya voivoiena, vutuna sibo ya kawa saġena.”

¹⁸Baninama Bada aitau e riuriuena da tauna taunoya verenama, naumeki da tauna vutuna verenama, be nam aitau taunaġa e riu munaġe be e riuna, “Taugu taunoya vereguma.”

Pol apasol kaikaiyovudima e riutuaġaiiedina

11 ¹Yau bana, yàwai baġemina da taumi sibo koyai aninegu da raġan ġaubonaġa taugu bua banegidima maika sibo yau giue è kawa saġe munaġeguna. ²Taugu èi nuapaġo guratemina maika Mamaitua ewai nuapaġoemina nama. Vutuna aubainama taugu nuaguma e rovorovona, deġoda taumi gewagewae koma naġo. Be taugu vutuna èi ririvuemina Keriso ġarone. Vutuna aubainama yà ġoeġoena da yodi taumi matatapu yà verauġemina Keriso ġarone. ³Taugu nuaguma e rovorovona, deġoda taumi Keriso waimuriwatanenama ko gose be gewagewae koma naġo, nema mota Ivi ya gwaya be yai kedadoka waigewana maika. ⁴Taugu nuaguma e rovorovona, baninama taugu Yesu Keriso è rarau guguyena inam natabu. Be waria e tava be Yesu ġesaudima e rarau guguyedina taumi inam Yesudima kowai aninedina. Arua Babau noġone koya paġona. Be raġanine arua ġesaudima ta tavatavana taumi inam aruidima kowai aninedina. Noġone vari verenama è rauguguyena ġaromie da yawasana sibo koya banavina. Be raġanine apasol kaikaiyovudima vari ġesaudima ta rarau guguyedina ġaromie, taumi inam varidima kowai aninedina. ⁵Taugu nam ama noġonoġota kauena da uma “apasoldima dosidima” adi verema maika taugu. ⁶Agunai taugu yau giuma nam diniboruboruna, be è kataiena aiyaba yà giugiuedina. Be taumi sibo koya kataie da taugu vari verenama è katai kauena. Baninama raġan toitoi taumi èi kataimina.

⁷Taugu vari verenama ġaromie è rauguguyena raġanine, taugu nam ami manema e paġona. Taugu nama è voiena sagumima aubainama. Inam kauinama gewagewa, bo? ⁸Taugu ekalesia ġesaudima mane a sagugu be taumi ġaromie è noyanoyana. ⁹Be taugu raġanine taumi mate, taugu nam aba ġaromie e ġoena. Be taugu nam aitau airaġan ġaromie

aiyaba e kiġiena, ibewa. Be yau ġoanama matabudi è ġoeġoedina, inam Masedonia banegidima taudiġa a sagusaguguna. Be taugu nam airaġan taumi aiyaba ei baġa rubumina da sibo koya utegu, be nam airaġan nama yà voia. ¹⁰Be taugu Yesu Kerisoe yà riuriu kauemina da taugu èi nuavere kaua da nam airaġan taumi ġaromie mane e paġona. Be Akaia provins nopone nam aitaŭ uma riunama aubainama kwai ġakegu, aba aubainama? ¹¹Nuaguma nam koma paġopaġo, bo? Ibewa, Mamaitua ya kataiena da taumi nuaguma ko paġopaġona.

¹²Be taugu nam airaġan ami manema yà paġo. Nama raġan matabuna yà voiana, baninama taugu nam ama ġoeġoena da inam “apasoldima kaikaiyovudima” maika yà voia, be ta riuemina da taudi kabe taugu maika. ¹³Inam banegidima taudi matabudi apasol kaikaiyovudima, be taudi adi gwayae banaga tawai kedadoka waigewedina. Taudi ta voivoiana maika kabe Keriso na taunoyama. ¹⁴Be taugu uma kaidima nam yà basedi, baninama Seitan nama e voivoiana. Tauna e voivoiana maika kabe Mamaitua na anea, ¹⁵vutuna aubainama Seitan na taunoyama ta voivoiana maika kabe Bada Yesu na taunoya. Be na damone tokare adi noyama na ruvae adi kovoġama ta banavina.

Pol raukivigewagewa ya banavidina vari verenama aubainama

¹⁶Yà riuriu munaġemina: Nam aitaŭ ko noġotigu da taugu banaga buabuagu. Be deġoda tam aitaŭ nama kwa noġotiguna, naumeki da yàwai baġemina da taumi sibo koyai aninegu da raġan ġaubonaġa taugu sibo yau giue è kawa saġe munaġeguna. ¹⁷Bada nam i riueguna da umanama sibo è voia. Be taugu yodi yà giuna banaga buebuedima maika. ¹⁸Banaga toitoi ta kawakawa saġe munaġedina dobu banegidima maika. Vutuna aubainama taugu yodi mate nama yà voiana. ¹⁹Taumi ko noġonoġotina da taumi kabe nuauyauya banegimi, be yaġoro taumi uma banegidima buebuedima adi giuna ko vaiedi be kowai aninedina. ²⁰Avedi da aitaŭa ġaromie tawai badabadana, ta kwayekwayemina, ta gwayegwayemina, bo ta kitakitatuagaemina, be ta riġeriġemina. Taumi matabumi ma nuaveremi uma banegidima kowai aininedina. ²¹Agunai taugu mate sibo uma kaidima è voiedina, be inam riukaua uma kaidima gewegewedima aubaidima taugu giu è moġiġina.

Be deġoda uma banegidima ti kawa saġe munaġedina, naumeki da taugu mate tokare banaga buebuedima maika yà kawa saġe munaġeguna. ²²Taudi deġoda Hibru? Taugu mate Hibru! Taudi deġoda Israel banegidima? Taugu mate Israel banegiguma. Taudi deġoda Eibraham na sedama? Taugu mate Eibraham natunama. ²³Yodi riukaua taugu yà giuna banaga buebuedima maika. Taudi Keriso na taunoyama? Taugu mate Keriso na taunoyama, be taugu è vere vavasaġana, nam maika taudi. Taugu è noya vavasaġana, nam maika taudi. Taugu raġan toitoi dibure

è naḡona, be taudi ibewa. Raḡan toitoi banaga a kwapukwapuguna. Be raḡan matabuna guriḡa yà kitakita saḡesaḡena. ²⁴Jius banegidima adi kovōḡama a uteguna, inam kwapue a riḡa gurateguna raḡan matabudi 39. Uma kauinama ḡarogue ya tubuḡana raḡan matabudi 5. ²⁵Be raḡan matabudi 3 banaga boreboree a kwapu gurateguna. Be raḡan tenaḡa a rauyekuguna. Be raḡan matabudi 3 wagae è monuna, be raḡan tenaḡa nopone taugu kupi da suara egasi pounè è tenamna. ²⁶Raḡan matabuna taugu vaḡaiḡa yà voivoiena, be deḡo deḡo yà naḡonaḡona yaba wainua nainairidima nopodiḡa yà naḡonaḡona, deḡoda taugu timai gurigu. Kabaita è banabanavidi, banaga danedanenedima è banabanavidi, yau banaga ḡomama Jius banegidima a raraukivi gewegeweguna, eteni banegidima a raraukivi gewegeweguna, meagai bo dobira banegidima matabudi a raraukivi gewegeweguna, tauwai sumaḡa kaikaiyovudima a raraukivi gewegeweguna, be mate egasie taugu ḡaubonaḡa sibo è gurina. ²⁷Taugu è noya da è noya guratana, be raḡan toitoi taugu nam e kanikanina, nam e kenakenana, be kani ya karakaraguna, nuaguma ya raukasakasana, è turutururu kauana be nam yau rupu da sibo èi rupugu.

²⁸Be inam yabedima matabudi yàwai nuaboyedina, be mate raḡan patapatanama taugu nuaguma e rovorovona, baninama ekalesia dobu matabuna nam sibo adi waisumaḡe a beku. ²⁹Deḡoda taudi adi waisumaḡama e gwaḡana, naumeki da taugu tokare nuaguma ei poyana taudi ḡarodie. Be aitaudeḡo gewagewa e voiena, taugu tokare nuaguma ei meidina.

³⁰Deḡoda taugu kawa saḡe munaḡeguma yà ḡoena, naumeki da taugu yau vogwaḡagwaḡae sibo è kawa saḡeguna. ³¹Mamaitua dà Badama Yesu Keriso Tamanama, taugu isanama yà kaisuḡusuḡuna. Tauna ya kataieguna da taugu nam ama kaikaiyovuna. ³²Raḡanine taugu Damaskas meagainè, be dabudine guyau Aretas ya miamiana. Be primia na tauḡarama banegidima matakedae a bodabodamana vunuḡiguma aubainama. ³³Be yau banagama siriga nopone a borugu be garigari bogane gaure ai dawe dobiḡeguna. Be inam kedane taugu è yawasanana.

Pol mara ya kitana

12 ¹Taugu yaḡoro agunai yà kawa saḡe munaḡeguna, avedi da taugu yau kawasagema nam banibiribiridi. Taugu yodi Mamaitua na matairama rauboni maika e maḡamaḡatarana, vutuna yà riuemina. ²Taugu Kuristen baneginama tenaḡa è kataiena, Mamaitua tauna ya nawena mara wairabuiteḡane be ya yovoḡa munaḡena.^e Be inam kauinama ya tubuḡana, yodi modi matabudi 14 a kovina. Inam baneginama tauna tubuḡe ya naḡo bo arue ya naḡo taugu nam e

^e 12.2 Pol taunaḡa e giugiu munaḡena.

kataiena, be Mamaitua tauna ya kataiena. ³Be taugu è kataiena da inam baneginama riukaua ya naḡona paradaisie. Tauna tubuḡe ya naḡo bo arue ya naḡo taugu nam e kataiena, be Mamaitua tauna ya kataiena. ⁴Be dabudine tauna yaba ya vaivaiedina tauna nam teneteneḡina da sibo ya giu waibatedi. Be mate Mamaitua nam tauna i aninena da sibo ya giuedi. ⁵Baninama inam baneginama aubainama, taugu tokare yà kawa saḡe munaḡeguna. Be taugu nam yau verema aubainama yà kawa saḡe munaḡeguna, ibewa da taugu yau vogwaḡagwaḡama aubainama yà kawa saḡe munaḡeguna. ⁶Deḡoda taugu yà kawa saḡeguna, taugu nam banaga buebuedima maika, baninama taugu aba da yà giugiuedina, inam matabudi riukaua. Be yaḡoro taugu kawa saḡe munaḡeguma nam ama ḡoēḡoena. Baninama taugu nam ama ḡoēḡoena da banaga tai noḡotana kabe taugu banaga dosigu. Banaga ḡarogue aba matedie a kitakitana, be beedie a vaivaiena, nama sibo a noḡota wairuvaguna. ⁷Mamaitua mara yabedima vereveredima toitoi yai kataiguna. Be tauna nam ima ḡoēḡoena da taugu inam yabedima yà kitedi, yà rauguyaguyauedi, be yà kawa saḡe munaḡegu. Vutuna aubainama tauna yaba gewagewanama ya uteguna maika kabe kea tunigie i midimidi. Uma yabanama inam Seitan na aneama, be tauna raḡan matabuna taugu e kawakawa pipiriguna. Inam aneama e voivoieguna da taugu nam teneteneḡigu da yà kawa saḡe munaḡegu.

⁸Taugu Bada raḡan rabuiteḡa èi giriena da uma kauinama gewagewanama sibo ḡarogue ya kaiporena. ⁹Be tauna ya paribeegu be umanama ya riuna, “Ibewa, yau raukiviverema tam aubaimma, inam naumeki. Baninama banaga adi wairewapanae ta noyanoyana aubainama, taugu yau wairewapanama ta semosemona, inam vutuna taugu nam ama ḡoēḡoena. Be deḡoda taudi nam adi wairewapanae ta noya, naumeki da taugu yau wairewapanama e maḡatarana.” Vutuna aubainama yau bana, taugu yau vogwaḡagwaḡama aubainama yà kawa saḡeguna. Baninama inam kauine Keriso na rewapanama nopogue e maḡamaḡatarana. ¹⁰Vutuna aubainama taugu yàwai nuavere kauana yau vogwaḡagwaḡama raḡanine. Maika kunura, pipiriri raḡandie, wainuatoitoi be raukivigewagewa ḡesaudima raḡandie. Vutuna aubainama taugu yàwai nuavere kauana, baninama taugu yau vogwaḡagwaḡama raḡanine taugu yàwai rewapanana.

Pol na wainuapaḡoma Korint banegidima ḡarodie

¹¹Taugu è giugiuna bua maika. Taumi koya vaiegu da nama è giuna. Taumi vutuna taugu koya kawa saḡeguna sibo, be nam taugu. Avedi da taugu nam banaga dosigu, be inam apasoldima kaikaiyovudima adi verema nam taugu yau verema maika. ¹²Taugu taumi mate raḡanine, taugu nuatauḡa mataira toitoi dosidima è voiedina da taumi sibo koya

kitedi be koya kataie da taugu riukaua apasol. ¹³Be yaba tenağa dobu ġesaudie ekalesia ġarodie è voiena, be taumi ġaromie nam e voiena. Inam nam ami manema bo ami waiyabama e pağona. Ebom, yau gewagewama uma ko noğota porenna.

¹⁴Be taugu yodi è vokaukauana da rağan aniwai rabuiteğanama yà vakitemina. Taugu nam mane bo aiyaba pağonama aubainama ġaromie ama veraverauna. Ibewa da taugu taumi aubaimima yà verauna. Taumi yau sedama. Vutuna aubainama taumi nam sibo aiyaba koya utegu, be taugu sibo aiyaba taumi è utemina, baninama Kerisoe taugu tamemima aubainama. ¹⁵Vutuna aubainama taugu ma nuaveregu yà sagu munağeguna. Be mate ami ġoane yà sagumina. Değoda taugu nama yà voiana, taumi tokare ko tuğaiegu bo ibewa? ¹⁶Taumi yodi koya kataiena da taugu nam aba ġaromie e pağona. Be ġesaumima koyai wavuguna da taugu kabe semoe mane è ragaragaudi. ¹⁷Inam nemanama sibo è voia bake? Bo banaga è riuriuporedina ġaromie, taudi ami manema a ragaudi, bo? ¹⁸Taugu Taitos èi bağana da tauna ġaromie sibo ya verauna turamaima tenağa mate. Be inam rağanine Taitos mane ġaromie ya pağo, bo? Ibewa, baninama tauma matabumai Arua Babau ġaromaie, be keda teneğine ka nağonağona.

¹⁹Taumi agunai kowai noğotana da taugu matemie kabe yà gudugudu tarağa munağegu. Be inam nam nama. Mamaitua matane taugu Kerisoe yà riuriu kauana. Yaba matabudi ġaromie è voivoiedina inam taumi sagumima aubainama da ami waisumağe sibo koya midi bagibagina. ²⁰Taugu nuaguma e rovorovona, baninama rağanine taugu ġaromie yà verauna, taugu nam yau ġoanama yabedima ġaromie yà kitedi be teneğine, taumi nam ami ġoanama yabedima ġarogue ko kitedi. Taugu nuaguma e rovorovona, değoda taumi nopomie yaba gewegewedima ama banavidi, maika waikawa riuriu, unura, medi, kanitoku, ġasi, waikarakarakutu, rauguyaguyau be tai nuabababağa. ²¹Taugu nuaguma e rovorovona, değoda ġaromie yà verauna nam ama ġoeğoena Mamaitua e voiegu da yà tunimayağa be yà ġaba, baninama taumi aitauga noğone mira, badara be yaba ġesaudima waitunimayamayağidima koya voivoiedina, inam gewegewedima nam ko noğota poredina.

Pol na riuwainoğotama damonama

13 ¹Yodi yau rağanima aniwai rabuiteğanama yà vakitemina. Be rağanine ġaromie yà tavana, inam gewegewedima matabudi kadi matamatama rabui bo rabuiteğa mate, da tà kawa didimanidina. ²Taugu maiğone yau verauma aniwai rabuine, dabudine banaga aitauga noğone gewagewa a voivoiedina è riuedina da nam sibo gewagewa a voia munağedi. Yodi taugu madanie be yağoro yà riuriu munağedina. Be rağanine taugu dabudine yà tavana, tokare taudi be banaga ġesaudima

aitauḡa gewagewa a voivoiedina mate nam yà kaiyawasidi, tokare yà kovoḡa tenaḡedina.

³Inam kauine taugu yài kataimi be ko kataie da Keriso taugue taumi ḡaromie e giugiuna. Be Keriso tauna kawa didimanimima tokare nam e gwage, ibewa. Tauna tokare na rewapanama dosine e kawa didimanimina. ⁴Keriso tubuḡinama vogwaḡagwaḡanama korosie a tuparatuna. Be yodi tauna Mamaitua na rewapanae e miamiana. Be inam kauinama teneḡinama, nama taugu. Taugu tubuḡiguma vogwaḡagwaḡanama be yodi Mamaitua na rewapanae taugu yà mia, be yà noyana taumi aubaimima.

⁵Taumi mayemima ko paḡo munaḡemi da taumi naumeki tauwai sumaḡa bo ibewa. Taumi Yesu Keriso mayanama ko paḡopaḡo bo kowai kaikaiyovu? ⁶⁻⁷Taumi ḡesaumima agunai ko noḡonoḡotina da taugu gewagewa è voiedina. Be taugu yà noḡonoḡotina da taumi koya kataieguna da taugu yau raurubue nam e bekuna, be taugu riukaua Keriso ḡaronama. Vutuna aubainama yà moimoiragina da taumi nam sibo aba gewegewedima koya voia munaḡedi. Inam nam taugu yau verema aubainama ama moimoiragina, ibewa da taumi ami verema aubainama. ⁸Taugu yau noyae riukaua nam ama tuatuaḡaiena, ibewa da raḡan matabuna riukaua aubainama yà noyanoyana. ⁹Taugu tokare yài nuavere kauana be nam yà riu bona badobadoemi, deḡoda taumi ami waisumaḡama ei rewapanana. Be tauma ka moimoiragina da taumi ami waisumaḡama ei rewapana, be e didimana kauana. ¹⁰Taugu uma letanama yà girugirumina ḡaromie da raḡanine taugu ḡaromie yà tavana, taugu nam ama ḡoeḡoena da yà ḡasiemi bo yà kovoḡimi. Bada rewapana ya uteuteguna, inam nam taumi kovoḡimima aubainama i uteguna, ibewa da sagumima aubainama ya uteguna.

Pol na waikaiwama

¹¹Yau bana, yau giuma damonama inam umanama: Koi nuaverena, ko raurubu da ko mia kauana, aba è riuemina nama ko voiedi be ma nuasubemi ko miana. Yodibe wainuapaḡo be suba Mamaituanama ḡaromie e miana.

¹²Taumi wainuapaḡoe koi kaiwa vivirana. ¹³Tauwai sumaḡa matabudi uma dabudine taumi tawai kaiwemina. ¹⁴Bada Yesu Keriso na raukiviverema, Mamaitua na wainuapaḡoma be Arua Babau na saguma matabumi ḡaromie ta kenana.